



**Qaasuitsup Kommuuniata avinneqarnissaa pillugu Naalakkersuisut kingusinnerpaamik UKA17-imi peqquneqarnissaannik Inatsisartut aalajangiiffigisassaattut siunnersuut. Naalakkersuisut siunnersuusionerminni aallaavigissavaat, Qaasuitsup Kommuniati kommunalbestyrelsep 29. Juuni 2016-mi ataatsimiinneranni kommunip nutaamik ilusilersorneqarnissaanut aalajangiunneqarsimasoq. Siunnersuutip aamma Naalakkersuisut Siulittaasuata siusinnerusukkut oqariatuutigisimasaat aallaavigissavaa, maannakkut Qaasuitsumut bloktilskuditut tunniunneqartartoq aningaasaqarnikkut Qaasuitsumi kommunit nutaat aallaavigissagaat.**

(Inatsisartunut ilaasortat Siverth K. Heilmann, Steen Lyng, Atassut)

(Siullermeenera)

**Borgmesterit borgmesteritut atuunnermik saniatigut aallaavittut allamik suliffeqarsinnaanerannik suliffimmilluunniit ingerlatsisinnaanerannik pisinnaajunnaartitsisumik, Naalakkersuisut kingusinnerpaamik UKA 2017-imi kommunit aqunneqarnerat pillugu Inatsisartut inatsisaanut allannguutissatut siunnersuummik saqqummiussinissamik peqquneqarnissaannik Inatsisartuni aalajangiiffigisassatut siunnersuut.**

(Inatsisartunut ilaasortaq Ane Hansen, Inuit Ataqatigiit)

(Siullermeenera)

**Kommunit kattunnerisa kingorna Naalakkersuisut malitseqartitsillutik aaqqissuusseqqissinnaanissamut UKA2017-mut sinaakutissanik tunngavigisassanillu nassuiaasioqqullugit Inatsisartut aalajangiiffissaattut siunnersuut.** (Inatsisartunut ilaasortaq Aqqaluaq B. Egede, Inuit Ataqatigiit)

(Siullermeenera)

Uani kommunalpolitikkimut tunngasut arlallit siunnersuutit suliarissavagut.

Paasiuminartuliornissaq pillugu Demokraatit immikkoortunut oqaaseqaataat ataasiakkaarlugit saqqummiutissavakka.

Immikkoortumut 83-mut tunngatillugu Atassutip kissaatigaa Qaasuitsup Kommuniata avinneqarnissaa pillugu Naalakkersuisut siunnersuusiusasut. Demokraatini paasivarput kissaat taanna piviusunngortinneqareernikuusoq Naalakkersuisut immikkoortoq 117-mut kingusinnerusukkut ilanngussaata naapertorlugu. Demokraatini tamatumunnga atatillugu aammaarluta malugeqqussavarput, Qaasuitsup Kommuniata avinneqarnissaanut kissaat tapersensoratsigu, tamanna najukkami politikerit aamma innuttaasut kissaatigimmassuk.



Uangutsinnulli pingaaruteqarpoq oqaatigissallugu, aaqqiisoqartariaqarmat piffissaq ungasinnerusoq isigalugu aamma atasinnaasumik, siunissami ukiorpassuarni atuuttussamik. Aamma ilanngullugu uangutsinnut pisariaqavissorpoq oqaatigissallugu, Qaasuitsup Kommuniiani kissaatigisat Namminersorlutik Oqartussat kommunilluunniit sinnerinut aningaasartuutitaqassanngimmata. Kommunip avinnissaanut aningaasartuutit aamma kommunit nutaat siunissami ingerlannissaannut immikkut aningaasartuutaajumaartussat taamaattumik akilerneqartariaqarput maannakkut Qaasuitsup Kommuniata atorsinnaasaasa iluanni. Aamma kommunit avinnissaannut isumaqatigiissusiortoqassappat isumaqatigiissummi qularnaarusupparput, kommuninut naligiissaarinnermut aaqqissuussineq imatut aaqqinneqassasoq qularnaarlugu kommunit allat ullumimut naleqqiullugu naligiissaarinnermut akiliinerusanninnissaat.

Immikkoortup 117-p Inatsisartut oqaluuserisassaannut ilanngunneqarnerata kingorna Demokraatini isumaqarpugut siunnersuut manna pisariaaruttoq, immikkoortup 117-p imarisaata matumap aalajangiiffigisassatut siunnersuut imai assigimmagit, tamanna tunngavigalugu taamaattumik siunnersuutip itigartinneqarnissaa inassutigaarput.

Immikkoortumut 136-mut ingerlaqqissinnaanngorpunga. Demokraatini borgmesteritut atorfik atorfittut tamakkiisutut isigaarput taamaattumik isumaqarpugut, borgmesterip tamakkiisumik borgmesteritut atorfini aalluttariaqaraa. Imaanngilarli siunnersuuteqartoq isumaqatigigipput oqarmat borgmesterit suliffiuteqaqqusaajunnaassasut. Takorloorneqarluarsinnaavoq borgmesteri ukiorpassuarni anginngitsunnguamik suliffiuteqarsimasoq borgmesteriunermi satiatigut. Tassa imaannerluni borgmesterip taamatut sullivimmik ingerlatsinissani unitsittariaqassagaa?

Tamatuma saniatigut innersuussutigissavagut ajornartorsiutit Naalakkersuisut akissutiminni eqqaasaat. Tamarmik Inatsisunik atortitsinnermut ataatsimiititaliami misissugassaqqipput taamaattumik tassunga siunnersuut innersuupparput.

Naggataatigut maannakkut immikkoortoq 137 suliarivarput. Tassunga atatillugu taamaallaat oqaatigissavara, kommuninik kattussuussinerup nalilersuivigineqarnissaa tamakkiisumik eqqarsaatigineqareermat. 2015-mi Naalakkersuisut BDO-mit nalunaarusiamik saqqummiussipput, tassani nalilersorneqarput iluarsartuussinerup aningaasatigut allaffissornikkullu kinguneri.

Kommunit kattunnerisa kingorna malitseqartitsilluni aaqqissuusseqqissinnaanissamut sinaakutissanik tunngavigisassanillu nassuiaasiortoqarnissaanut Inuit Ataqtigiiit matumani siunnersuuteqarput tamannali misissuinnermut nalunaarusiarineqareersunullu suliarineqareersunut aammalu manakkorpiaq ingerlasunut iluaquusiinnaasutut misinnanngilaq. Tamanna tunngavigalugu inassutigaarput siunnersuut itigartinneqassasoq.